



Sch' ils furniturs da servetschs en il sector da sanadad collavuran, p. ex. cun agid d'in center da sanadad, pon els plitost far frunt al squitsch finanziel.

FOTO O. ITEM

# Ulteriurs centers da sanadad èn necessariis

## Discussiun detagliada davart il program annual 2019

■ (anr/fa) Il program annual cuntegna las finamiras che la regenza ha formulà per il proxim onn per ils differents secturs. Per cuntanscher quell'as finamiras dovra ella il sustegn dal cussegl grond.

Il program annual da la regenza e la planisaziun finanziala èn ils instruments principals per fixar la strategia politica dal chantun Grischun durant il proxim onn. La cumissiun per politica statala e strategia ha prendi sut egl las 28 finamiras fixadas en il pogram annual 2019. «Nus avain examinà las finamiras e pudain dir che quell'as sa cunfan cun ils principis dal cussegl grond», ha ditg Bruno W. Claus (pld, Cuir), il president da la cumissiun. Perquai ha el proponi al parlament da prender enconuschientscha dal program annual. La discussiun detagliada da quel nun era contestada.

### A la periferia ed al cunfin nazional

En connex cun la libra circulaziun da persunas èn vegnidas introducidas las mesiras accompagnantas. Quell'as duain proteger las persunas cun activitad da gudogn dad abus da las prescripziuns svizras davart las

pajas e las cundiziuns da lavur. Il Grischun è confruntà cun la concurrenza da las regiuns cunfinantas austriacas e talianas. Per quel motiv è el a l'avis da la regenza pli ferm sut squitsch ch'auters chantuns en Svizra. Ella ha formulà perquai la finamira: «La confederaziun enconuscha la situaziun extraordinara dal chantun Grischun e resguarda ses basegns.» Per cuntanscher quella finamira èsi tenor la regenza indispensabel che las mesiras accompagnantas vegnian realisadas e respectadas. Philipp Willhelm (ps, Tavau) ha menziunà che la fracziun da la ps saja satisfatga da questa finamira da la regenza: «Uschia pon ins procurar che las pajas minimalas vegnian respectadas ed avair al medem mument vivand ina buna relaziun cun l'Europa.»

### Partenaris en il sector da sanadad duain collavurar

Quest onn prevesa la regenza da pudair suttametter al parlament la revisiun parziala davart la promoziun da la tgira da mal-sauns e l'assistenza e la tgira da persunas attempadas. Quai duai schabegiar cun ina cooperaziun dals partenaris ospitals, Spi-

tex e las chasas d'attempads e da tgira en las singulas regiuns da sanadad. «La collavuraziun necessaria dals partenaris da quel sector duai vegnir cuntanschida cun fundar centers da sanadad», scriva la regenza en questa finamira, «quell'as fundaziuns duain vegnir promovidas cun als dar sustegn finanziel.» A la dumonda da Gabriela Tomascett-Berther (pcd, Trun) co che sa preschentia la situaziun en chausa ha ditg cusseglier guvernativ Christian Rathgeb: «Dapi l'onn 2013 avain nus la strategia da stgaffir cun agid da centers da sanadad structuradas decentralas ed evitar uschia da stuaier serrar ospitals regionalas.» Ils furniturs da servetschs da sanadad stoppian vegnir activs en lur regiuns e cooperar. «Uschia daventan els pli fermes ed èn abels dad exister vivand, malgà il squitsch creschent da vart da la confederaziun», ha menziunà Rathgeb, «sch' ils responsabels p. ex. d'in ospital na collavuran betg cun ils auters furniturs da servetschs da sanadad è il privel grond che Berna di, quel ospital è memia char, nus chalain da l' sustegnair.» Il parlament grischun ha prendi enconuschientscha dal Program annual 2019.